

NÚMEROS

(Iraéutanüxüarü ugüchiga)

Nixugü ga Iraéutanüxügü ga Chinaíwa

1 ¹Rü yexguma norü taxre ga taunecüwa nanguxgu nax Eyítuanewa ínachoxüxü, rü gumáarü taxre ga tauemacügu nixí ga Tupana ga Moichémaxã yadexaxü ga guma Tupanapatawa ga Chinaíarü chianexüwa. ²⁻³Rü Moichéxü namu rü nhanagürü: —¡Peyaxugü i guxüma i Iraéutanüxügü i nügütanüxüchigü, rü wüxi ya ípatacüãxchigü, nax nüxü pecuáxüçax i naéga rü norü mu i guxüma i ngëma yatüxügü i 20 ya taunecü nüxü ngëxmagüxü rüçxna yexeraarü taunecüãxgüxü rü marü mexü nax churaragü yixígüxü! Rü natanüxütücumüchigügu tá cunawüéga. Rü Aróu tá nixí ya cuxü rüngüxëécü nawa i ngëma puracü. ⁴Rü ngëxgumarüxü ta rü wüxitücumüwachigü rü tá naxçax peca i wüxi i yatü i woetama ngëmatücumüwa ãëxgacü ixixü nax pexü nangüxëëxüçax. ⁵Rü nhaagü nixí i naéga i ngëma ãëxgacügü i tá pexü rüngüxëëgüxü. Rü Rubéütanüxüwa rü Erichú ya Chedeú

nane tá nixí. ⁶Rü Chimiáütanüxüwa rü Cherumié ya Yurichadáí nane tá nixí. ⁷Rü Yudátanüxüwa rü Naachóu ya Aminadábi nane tá nixí. ⁸Rü Ichacátanüxüwa rü Natanaéu ya Chuá nane tá nixí. ⁹Rü Yeburóütanüxüwa rü Eriabé ya Elóu nane tá nixí. ¹⁰Rü Yúche nane ga Efraítanüxüwa rü Ericháma ya Amiýyi nane tá nixí. Rü Yúche nane ga Manachétanüxüwa rü Gamariéu ya Pedachú nane tá nixí. ¹¹Rü Bëyamítanüxüwa rü Abidáu ya Yideóni nane tá nixí. ¹²Rü Dáütanüxüwa rü Aiyeché ya Amichadáí nane tá nixí. ¹³Rü Achétanüxüwa rü Payiéu ya Ocráú nane tá nixí. ¹⁴Rü Gáyitanüxüwa rü Eriacháfi ya Reué nane tá nixí. ¹⁵Rü Natarítanüxüwa rü Aíra ya Enáú nane tá nixí —nhanagürü ga Cori ya Tupana. ¹⁶Rü yemagü nixí ga yema norü ãëxgacüchigü ga nadexü nax natanüxügümaxã inacuaxgüxüçax.

²⁰⁻²¹Rü yexguma marü nügütanüxüchigü rü wüxi ya ípatacüãxchigü yaxugüãxgu rü nayawügüéga ga yema yatüxügü ga 20 ga taunecü nüxü yexmagüxü rüçxna

yexeraaru taunecüãxgüxü rü marü mexü nax churaragü yixigüxü. Rü norü mu rü nhaa nixĩ: Rü Rubéü ga Iraéu nane ga yacütanüxüwa rü 46,500 ga yatüxügü nixĩ ga churarawa mexü. ²²⁻²³Rü Chimiáütanüxüwa rü 59,300 nixĩ. ²⁴⁻²⁵Rü Gáyitanüxüwa rü 45,650 nixĩ. ²⁶⁻²⁷Rü Yudátanüxüwa rü 74,600 nixĩ. ²⁸⁻²⁹Rü Ichacátanüxüwa rü 54,400 nixĩ. ³⁰⁻³¹Rü Yeburóütanüxüwa rü 57,400 nixĩ. ³²⁻³⁵Rü Yúche nanegütanüxüwa rü Efraítanüxüwa rü 40,500 nixĩ. Rü Manachétanüxüwa rü 32,200 nixĩ. ³⁶⁻³⁷Rü Bëyamítanüxüwa rü 35,400 nixĩ. ³⁸⁻³⁹Rü Dáütanüxüwa rü 62,700 nixĩ. ⁴⁰⁻⁴¹Rü Achétanüxüwa rü 41,500 nixĩ. ⁴²⁻⁴³Rü Natarítanüxüwa rü 53,400 nixĩ. ⁴⁴⁻⁴⁶Rü yexguma Moiché rü Aróü yaxugügü wüxigu namaxã ga yema 12 ga norü ngüxëëruügü ga wüxítücumüariü äëxgacüchigü ixigüxü, rü guxüwama rü 603,550 wa nixĩ ga nanguxü ga yema yatüxügü ga 20 ga taunecüwa ngugüxü rü churarawa imexü.

Lewítanüxüaru puracüchiga

⁴⁷Notürü yexguma yaxugügü ga yema yatügü ga marü churarawa imexü rü yema Lewítanüxügü rü tama nixugü ga natanüwa. ⁴⁸Yerü ga Cori ya Tupana rü marü Moichémaxã nüxü nixu rü nhanagürü nüxü: ⁴⁹“Ngëxguma tá cuyaxugü i Iraéutanüxügü ;rü taxütáma cuyaxugü i ngëma Lewítanüxü ixigüxü! ⁵⁰Rü ngëma Lewítanüxügü rü chapatawaaru puracütanüxü tá cuyaxigüxëxë nax nüxna nadaugüxüçax ya yima chapata rü norü ngëmaxügü. Rü ngëxguma ngextá penangegüga ya yima chapata, rü nümagü tá nixĩ i

ínangexechigüãxü namaxã i guxüma i norü ngëmaxügü i namaxã çaxüçax napuracüxü. Rü nümagü rü tá chapataxü ínapemaeguächí”, nhanagürü ga Cori ya Tupana.

.....

Caixanexü ga Tupanapataétügu íruxixüchiga

9 ¹⁵Rü yexguma yanguxgu ga guma Tupanapata, rü yema ngunexügü rü wüxi ga caixanexü naétügu ínarüxĩ. Rü yáuanecü rü naétüwa nangoxoxü ga üxiemarixü ixixü, rü nayexmaecha nhüxmata yangóonexümare. ¹⁶Rü guxüguma yemaacüãxü nixĩ, rü yexguma ngunecü rü caixanexü nixĩ ga naétügu íruxixü ga guma Tupanapata, rü çütacü rü nhama üxiemarixü nixĩ ga naétüwa ngoxoxüxü. ¹⁷Rü yexguma guma Tupanapataétüwa iyachüxüächixügü ga yema caixanexü, rü nüma ga Iraéutanüxügü rü inaxiächixü ga nax inaxixü. Rü yema íyachaxächixüwa ga yema caixanexü, rü yéma nayachaxächitanü, rü yexma napegü. ¹⁸Rü yexguma Cori ya Tupana namaxã nüxü ixuxgu ga nax inaxiächixü rü inaxiächi. Rü yexguma namaxã nüxü yaxuxgu ga nax inachoxü rü yexma narücho. Rü yexguma yema caixanexü Tupanapataétüwa yexmaechagu rü tama inaxĩ.

.....

Tupana rü Iraéutanüxügümaxã nanaxuegu nax namachi tá nüxna naxãxü

11 ⁴Rü yema Iraéutanüxügü rü nhuxre ga Eyítuanecüãxgümaxã narüxücutanü, rü yema duüxügü nixĩ ga

nüxna cuaxächieüü ga yema ñna ga Eyítuanewa nangõxgüü. Rü nüma ga Iraéutanüxügü rü düxwa yemaga naxĩnüe rü yemaçax nidexagü rü nhanagürügü: —Chierü tüxü nangexmagu i namachi nax nangõxüçax. ⁵Rü nhuxäcü nüxna tacuaxächie ga yema choxni ga chíxü ga ngetanüácüma ingõxgüü ga Eyítuanewa. Rü ngëxgumarüxü ta nüxna tacuaxächie ga nhuxäcü nangõxü ga pepínu, rü meráü, rü chabúragü rü áyu. ⁶Notürü i nhuxmax rü taiyamaxã nua tayuechaü, erü nataxuma i to i taxacü i nüxü idauxü rü manáxicatama —nhanagürügü. ⁷Rü yema maná rü nanachicúriachireraxü rü nadexra nhama taxacü i dextragüxürüxü. ⁸Rü nüma ga duüxügü rü nanade ga yema maná ga dauxüwa rüyixiixü. Rü nhuxüchi nayacamügü rü nanamuxragü rü nhuxüchi nayaxütachinü. Rü yema maná rü nhama chíxüwa ínaguxürüxü nixĩ ga naaca. ⁹Rü chütacü ga yexguma nanguxgu ga cherenaga yema ínapegüxüétügu, rü yexguma ta nixĩ ga nayixü ga maná. ¹⁰Rü nüma ga Moiché rü nüxü naxĩnü ga Iraéutanüxügü ga naãxpatawachigü nax yema õnacax yadexagüxü. Rü nüma ga Cori ya Tupana rü yemaçax poraacü nanu rü yexgumarüxü ta ga Moiché. ¹¹Rü nüma ga Moiché rü Tupanaxü nhanagürü: —Chama nax curü duüxüchirex chixixü ¿rü taxacüçax tama chamaxã cutaãxë rü ngëmacax chauuchaama choxü cunangenagüxëxë i nhaa duüxügüarü guxchaxügü? ¹²¿Ëxna chauxacügü nixĩgü rü ngëmacax choxü cumuxü nax nhama õxchanagürüxü chayagagüxü i

nawa i ngëma naane ga nüxcüma torü oxigümaxã nüxü quixuxü? ¹³¿Rü ngextá tá namachi choxü ta iyangaüxü nax chanachibüexëxüçax i guxüma i nhaa duüxügü? Rü auxeäcüma nixĩ i choxü yacaaxügüechaxü rü nhagüxü choxü: “¿Rü torü ngõxruxü i namachi toxna ta naxã!” nhagüxü. ¹⁴Rü chama rü marü tama choxü natauxcha nax chaxica namaxã ichacuáxü i nhaa duüxügü. Erü ngëma puracü rü nata rü ngëmacax taxucürüwa chaxica chanaxü. ¹⁵Rü ngëxguma tá ngëmaäcü chamaxã quixixgu ¿rü noxtacüma choxna nayaxu i nhaa chorü maxü, ega choxü cungechaüxgu! Rü ngëmaäcü tá marü taxütáma chauuchaama chayangenagü i nhaa duüxügüarü guxchaxügü —nhanagürü ga Moiché. ¹⁶Notürü nüma ga Cori ya Tupana rü Moichéxü nangãxü rü nhanagürü: —¿Ëcü nanutaquexe i 70 i norü ãëxgacügü i Iraéutanüxügü i duüxügü naga ínüexü, rü chapatawa nagagü! ¿Rü ngëma choxü namaxã yariungüxëxë! ¹⁷Rü chama rü tá ngëxma ícharüxü, rü ngëma tá cumaxã chidexa. Rü tá ngëma ãëxgacügüna chanaxã i ngëma chauãxë i cuwa ngëxmaxü nax nümagü cuxü nangüxëëgüxüçax nax namaxã ínacüaxgüxü i nhaa duüxügü. Rü ngëxguma rü marü taxütáma cuxica namaxã icuçuax. ¹⁸¿Rü nhuxüchi namaxã nüxü ixu i duüxügü nax nügü yamexëëgüxüçax naxçax i moxüarü ngunexü, rü ngëmaäcü tá nixĩ i namachi tá nangõxgüxü! Erü marü nüxü chaxĩnü nax auxeäcüma nhagüxü: “¿Nhuxcü ngexü yixĩ i namachi rü ta ingõxgü? Rü narümemae nixĩ ga Eyítuanewa

iyexmagügu”, nhagüxü. Rü marü name rü chama tá namachi nüxna chaxã nax nangõxgüaxüçax. ¹⁹Rü taxütama wüxitama i ngunexü nanangõxgü rü bai i taxre, rü bai i 5, rü bai i 10, rü bai i 20 i ngunexüguxicatama tá nanangõxgü. ²⁰Rü wüxi ya tauemacüxüchi tá nixí i namachi nangõxgüxü nhuxmatáta naemamaxã yangüãtanücüxüx rü nawa naxoégagü erü choxü naxoe i chamax i Cori ya Tupana nax natanüwa changexmaxü. Rü naxauxeãcúma rü chapexewa nhanagürügü: “¿Rü taxacüçax ga Eyítuanewa íchoxüxü?” nhanagürügü —nhanagürü ga Cori ya Tupana. ²¹Rü yexguma ga Moiché rü Tupanaxü nangäxü rü nhanagürü: —Rü ngëma duüxügü i chawe rüxixü rü 600,000 i yatügü nixígü. ¿Rü nhuxãcü nüxü quixuxü rü wüxi ya tauemacü tá nixí i namachi toxü cungõxëxü? ²²¿Rü ngextá nangema i ngëma muxü i carnérügü rü wocagü nax ngëma tadaixüçax rü guxaxü yangumachixüçax? Rü woo chi guxüma i choxni i taxü i taxtücüçax nüxna ixãxgu rü taxüchima nüxü ningu —nhanagürü. ²³Notürü nüma ga Cori ya Tupana rü nanangäxü rü nhanagürü: —¿Cuma nagu curüxínügu i ngëma chorü pora rü naxíraxü? Rü nhuxmax tá nüxü cudau nax aixcuma tá yanguxü i ngëma nüxü chixuxü —nhanagürü.

³¹Rü nüma ga Cori ya Tupana rü ínananguxëxë ga wüxi ga tacü ga buanecü ga márwa ne buemacü. Rü gumaemagu ínangugü ga muxüchixü ga ngugagü rü yema ínapegüxügü nayi rü namaxã naxãanemare nhuxmata wüxi i

ngunexü itixü ga nax namaxã naxãanemarexü. Rü wüxi ga métruwa nangu ga norü yaxcü ga nügüétügu nax nayixü. ³²Rü guxüma ga yema ngunexügu, rü guxüma ga yema chütaxügu rü moxüãciarü ngunexügu rü nüma ga duüxügü rü nanade ga yema ngugagü. Rü guxema rü noxremaexü dexe rü 10 chita tüxü nayexma. Rü yema ínayexmagüxüãxtügu tayapagü. ³³Notürü yexguma yexwacax nüxü nangõxnetagügu ga namachi ga yema ngugagü, rü nüma ga Cori ya Tupana rü duüxügümaxã nanu, rü nanayuexëxë ga muxüma. ³⁴Rü yemacax nixí ga Quibrüchi-Táwamaxã naxüéagüãxü, yerü yexma nixí ga natãxgüxü ga yema duüxügü ga õnaguxicatama rüxínüexü.

Moiché rü Canaãanewa nanamugü ga 12 ga ngugütaeruügu

13 ¹Rü nüma ga Cori ya Tupana rü Moichémaxã nidexa rü nhanagürü: ²—¿Ëcüx, Canaãanewa namugü i 12 i yatügü nax ngëma yangugütaegüxüçax, erü ngëma naane tá nixí i pexna chaxãxü i pema i Iraéutanüxügü! ¿Rü wüxitücumüwachigü rü inamuãchi i ngëma norü ãëxgacü ixixü! —nhanagürü ga Tupana. ³Rü nüma ga Moiché rü yema chianexü ga Paráügu ãégaxüwa inanamuãchitanü ga yema ãëxgacügü yematama Tupana namaxã nüxü ixuxürüxü. Rü guxüma ga yema 12 rü natanüxügü ga Iraéutanüxügü nüxü ngechaüügüxü nixígü.

17Rü nüma ga Moiché rü nayamugü ga yema yatügü nax Canaáanewa naxixüçax rü yéma yangugütaegüxüçax. Rü nhanagürü nüxü —;Ngëma chianexü i Neguébiguama pexí rü ínamáxpüxanexüwa pechopetü! 18Rü tá penangugü i ngëma naane, rü yima ñane rü ngoxi naporae i ngëma duüxügü i ngëxma áchiügüxü rüexna tama, rü ngoxi namu rüexna tama. 19Rü tá penangugügü ya yima norü ñane rü ngoxi düxenügümare yixí rüexna mea ínapoxegugü, rü ngëma naane i nawa nangexmagüxü rü ngoxi mexü i waixümü yixí rüexna tama. 20Rü tá penangugü rü ngoxi nawaxmüane rüexna tama. Rü ngëxgumarüxü ta penangugü rü ngoxi nanaixnecüá rüexna tama. ;Rü tauxü ipemuüexü! Rü nua tá penge i ngëmacüãx i nanetüarü o —nhanagürü ga Moiché. Rü yema naanewa rü meama nüxíraxüxü ga norü úwaarü o idauxgu nixí ga yexguma Moiché yéma namugüga ga yema yatügü ga ngugütaewa yéma íxü. 21Rü yema yatügü rü yéma naxí rü nayangugügü ga yema nachixüane. Rü súwaama ga chianexü ga Chí íyexmaxüwa inanaxügüe ga nax nangugügüãxü ga yema naane rü nhüxmata ñane ga Réubiwa nangugü ga nórciwaama ga ñane ga Amáarü ngaicamána. 22Rü yema chianexü ga Neguébiwaama nachocu rü nhüxmata ñane ga Ebróüwa nangugü. Rü guma ñane nixí ga naxáchiügüxü ga Aimáütanüxügü, rü Checháitanüxügü rü Tamáitanüxügü ga Enáquitaagü ixígüxü. Rü guma ñane ga Ebróü rü marü nüxcüma naxü. Rü marü 7 ga taunecü

nüxíra naxü naxüpa ga guma ñane ga Yoá ga Eyítuanewa yexmane. 23Rü yema ngatexü ga Ecúwa nangugü, rü yéma nayadaegü ga wüxi ga úwamaxüchacüxü ga tárexex üchixüarü oóxü. Rü wüxi ga naiwa nayawëxgü rü yemaacü nügümaxá nayangetaügü. Rü orix ga fígu rü orix ga boxra rü ta ningegü. 24Rü yema ngatexü rü Ecúgu nanaxüéagü naxçax ga yema úwarexe ga yéma yadaegüxü ga yema Iraéutanüxügü. 25-26Rü 40 ga ngunexü ningegü ga nax nangugüanegüãxü. Rü yemawena rü naxçax nawoegu ga yema nachica ga Cáyi ga Paráüarü chianexüwa yexmaxü yerü yéma nixí ga nayexmagüxü ga Moiché rü Aróü rü guxüma ga Iraéutanüxügü. Rü nüma ga yema ngugütaewa ne íxü rü nüxü nixugügü ga guxüma ga yéma nüxü nadaugüxü. Rü nüxü nanawëxgü ga yema nanetüarü o ga yema nachixüanewa ne nangegüxü. 27Rü Moichémaxá nüxü nixugüe rü nhanagürügü: —Marü nawa ne taxí i ngëma naane i nawa toxü cumugüxü. Rü aixcuma nixí i ngëma naanewa rü guxüwama nangexmaxü i nabüane i mexü rü taguma nataxüxü. Rü nhaagü nixí i ngëma nanetügü i ngëma muxü. 28Notürü ngëma duüxügü i ngëxma áchiügüxü rü nipora, rü yima norü ñane rü nita rü ínapoxegugü. Rü to ga yéma nüxü tadauxü nixí ga guma Enáquitaagü i nariüütama imáchanexüchixü. 29Rü ngëma Neguébianewa rü ngëxma naxáchiügü i ngëma Amaréchitanüxügü. Rü ngëma ínamáxpüxanexügu rü naxáchiügü i ngëma Etéutanüxügü rü

Yebuchéutanüxügü rü Amuréutanüxügü. Rü márcutügu rü natü i Yurdáücutügu nixí i naxächüügüxü i Canaáanecüãxgü —nhanagürügü. ³⁰Rü yexguma ga wüxi ga yema ngugütaeruxü ga Carébi rü nanachianexêxê ga yema duüxügü ga Moichépepewa yexmagüxü rü nhanagürü: —¡Ngíxã tóxrüxü tayaxíxêxê i ngêma naane, erü yixema rü tüxü natauxcha nax tóxrüxü yaxíxêxê! —nhanagürü. ³¹Notürü ga yema togü ga namücügü rü nanangãxügü rü nhanagürügü nüxü: —Tama nixí i namexü nax namaxã yigü idaixü i ngêma duüxügü, erü nüma rü tá tüxü narüporamaegü —nhanagürügü. ³²Rü yexguma ga yema togü ga Carébimücügü rü nüxü nixugüe nax nachixexü ga yema naane rü nhanagürügü: —Rü ngêma nachixüane i nawa ngugütaewa ne taxíxü rü tama mexü nixí. Rü ngêma naane ga tayangugüxü rü nachuxu rü ngêmagagu muxüma i ngêma naanegu áchiügüxü i duüxügü rü nayue. Rü nhuxüchi guxüma ga yatüxügü ga yéma nüxü tadauxü rü nitaxüchi. ³³Rü nüxü tadaugü ga Enáquitánüxü ga itaxüchixü rü máchanexüchixü. Rü yemaçax ga toma ga naxütawa nax togü tadaugüxü rü tanamunügüraxümare. Rü nümagü rü ta yemaacütama toxü nadaugü —nhanagürügü.

**Nüma ga Iraéutanüxügü rü tama
Cori ya Tupanaga naxínüechaü**

14 ¹Rü yexguma yema ngugütaewa ne íxüarü orexü naxínüegu ga yema Iraéutanüxügü rü aita naxüe, rü yema chütaxü rü axugu

ningunexügü. ²Rü guxüma ga nümagü rü chixri Moiché rü Aróuchigagu nidexagü, rü nhanagürügü: —Narümemaie chi nixí ga Eyítuanegu nax iyuexü rüexna nuxã ínachianexügu rü tama ngêma naane i yangugügüxügu nax iyuexü. ³Rü taxacüwa ya Cori ya Tupana i ngêma nachixüanewa tüxü nagagüxü nax ngêxma daigu iyuexüçax, rü taxmãxgü rü taxacügü rü tóru uanügümexêgu tayixüçax? Rü narümemaie nixí i Eyítuanecãx tawoegu —nhanagürügü. ⁴Rü yexguma ga wüxichigü nügümaxã nhanagürügü: —Ngíxã nüxü taxuneta i wüxi i tóru ãêxgacü nax tamaxã inacüaxüçax rü ngêmamaxã Eyítuanecãx iwoeguxüçax —nhanagürügü. ⁵Rü yexguma ga Moiché rü Aróu rü nhaxtüanegu nanangücuchitanü napëxewa ga guxüma ga duüxügü. ⁶Rü nüma ga Yuchué rü Carébi ga yema naane ngugügüxü rü norü ngechaümaxã nügü narügáutechirügü. ⁷Rü nhanagürügü nüxü ga guxüma ga yema Iraéutanüxügü: —Ngêma naane ga ítayadaugüxü rü naane i mexü nixí. ⁸Rü nüma ya Tupana rü tá tüxü narüngüxêxê rü tüxü nanatauxchaxêxê nax ngêma naanegu ichocuxü. Rü tá tüxna nanaxã nax tóxrüxü yixíxüçax. Rü ngêma nachixüanewa rü nhama dexárüxü taguma nataxu i ñna i mexü. ⁹Notürü i pemax rü tama name nax Cori ya Tupanamaxã penuexü rü tama name i nüxü pemuüe i ngêma nachixüanecüãx i duüxügü. Erü nümagü rü tá nhama poü i ngóxürüxü tá tüxü nixígü i taxçax erü nataxuma i texê nax nüxna dauxü. Notürü i yixema rü tüxü nangexma ya

Cori ya Tupana ya tuxna daucü. ¡Rü tauxü i pemuñexü! —nhanagürügü. ¹⁰Rü woo yemaxü nax naxinüexü ga duñxügü rü nanueama rü nutamaxã ínanamuxüchigüchaü. Notürü ga Cori ya Tupanaarü üüne rü yéma nangox ga guma Tupanapatawa napexewa ga guxüma ga Iraéutanüxügü. ¹¹Rü yexguma ga nüma ga Cori ya Tupana rü Moichéxü nhanagürü:

—¿Nhuxguxüratáta nixí i choxü ínaxinüexü i nhaa duñxügü? ¿Rü nhuxguxüratáta nixí i nüxü naxoexü nax tama choxü yaxögüaxü rü woo nüxü nax nadaugüxü ga yema mexügü ga chaxüxü? ¹²Rü naxçax tá núma chanamu i wüxi i daweane i nawa nayuexü nax ngëmaäcü tama nawa nangugüxüçax i ngëma naane. Notürü cuwa tá nixí i ichanangoxëëxü i to i duñxügü i nhaa duñxügüxü rümumaexü rü rüporamaegüxü —nhanagürü.

¹³⁻¹⁴Notürü nüma ga Moiché rü Cori ya Tupanaxü nangäxü rü nhanagürü: —Notürü ngëma Eyítuanecüãxgü rü meama nüxü nacuaçgü ga curü poramaxã nax ícunguxüxëëxü ga nhaa duñxügü. Rü ngëxguma ngëma Eyítuanecüãxgü nüxü cuaxgügu i ngëma nhaa duñxügümaxã cuxüxçhaüxü rü tá Canaãanecüãxgümaxã nüxü nixugüe, rü nümagü rü tá ta nüxü nacuaçgü. Rü nümagü i ngëma Canaãanecüãxgü rü marü nüxü naxinüe nax cuma rü natanüwa cungexmaxü i ngëma Iraéutanüxügü, rü cugü naxçax cungoxëëxü, rü cuma i guxüguma ngëma caixanexüwa naétüwa cungexmaxü, rü ngëma caixanexügu napexe quixüxü i ngunecü rü üxiemagu

i chütacü. ¹⁵Notürü ngëxguma tá cunadaixgu i nhaa chautanüxügü rü ngëma torü uanügü i cuxü cuáchigagüxü rü tá nhanagürügü: ¹⁶“Rü nüma ya Cori ya Tupana rü nüxü naguxcha nax nawa nangugüxëëäxü i ngëma naane ga namaxã ínaxunetaxü, rü ngëmacax nixí i ínaxianexügu tuxü nayuexëëäxü”, nhanagürügü tá. ¹⁷Rü ngëmacax nixí, Pa Corix, i namexü nax icunawëxü i curü pora yema tomaxã nüxü quixuxürüütama. ¹⁸⁻¹⁹Rü woo nüxü quixu nax tama nüxü cuxüpetümarexü i ngëma chixexü ügüxü rü cunapoxcuxü i ngëma nanegü rü natagü nagagu i nanatügüarü chixexü, notürü nüxü quixu ta nax tama cunuxwaxexü rü nataxüchixü i curü ngechaü rü toxü nüxü cungechaüxü i torü chixexü. Rü ngëmacax cuxü chacaçxü nax nüxü nüxü curüngümaxü i nhaa duñxügüarü chixexü, yerü marü yaxna namaxã cuxinü ga yexguma Eyítuanewa ínachoxügutama nhuxmata nua nhaa nachicawa nangugü —nhanagürü ga Moiché.

Cori ya Tupana rü tama nayanaxoxëxë ga duñxügü notürü taxütáma nawa nangugü ga yema naane ga namaxã ínaxunetaxü

²⁰Rü nüma ga Cori ya Tupana rü Moichéxü nangäxü rü nhanagürü: —Marü name. Chama rü tá nüxü nüxü charüngüma i ngëma duñxügüarü chixexü ngëma cuma choxna naxçax cucaçxürixü. ²¹⁻²³Notürü ngëma nax aixcuma yixixü nax chamaxüxü rü guxü i nhama i naanewa nax changexmaxü, rü ngëxgumarixü tá ta aixcuma nixí nax

taxúetáma ya yíxema Iraéutanüxügü ga
 nüxü daugüxe ga yema chorü üüne rü
 yema mexügü ga chaxüxü ga
 Eyituanewa rü nua ínachianexüwa, rü
 bai tá ya wüxie ya yíxema duëxëgü nüxü
 daugüxü i ngëma naane ga tümaarü
 oxigümaxã nüxü chixuxü. Rü bai tá ya
 wüxie ga choxü ügümarexe rü choxü
 oexe rü tama chauga ñnüexe nüxü tadau
 i ngëma naane. Rü bai tá ya wüxie. ²⁴Rü
 yimã chorü duü ya Carébiicatama nixí
 ya mexügu rüxññü rü aixcuma chauga
 ññü. Rü ngëmacax yimáxüxícatátama
 nixí i ngëxma chaxücuxëëxü nawa i
 ngëma naane ga yangugüxü. Rü ngëma
 nataagü rü ngëxma tá naxáchiügü.

.....

²⁷Notürü ngëma togü i Iraéutanüxügü i
 chixri chauchiga idexagüxü ¿rü
 nhuxguxüratáta yaxna namaxã
 chaxññüxü nax chauga naxññüxüçax?
²⁸Rü ngëmacax i ngëma duüxügü i
 naxçax ícagüxü nax nua ínachianexügu
 nayuxü ;rü namaxã nüxü ixu rü chama
 ya Cori ya Tupana rü ngëma nümatama
 naxçax ínacagüxüãcü tá naxçax chanaxü!
²⁹Rü guxüma i ngëma duüxügü i 20 ya
 taunecüwa ngugüxü i chixri chauchiga
 idexagüxü rü tá nuxã ínachianexügu
 nayue. ³⁰Rü bai tá i wüxi i ngëma
 duüxügü nagu nachocux i ngëma naane i
 pemaxã nüxü chixuxü. Rü Carébi rü
 Yuchuécicatama tá nixí i ngëma ngugüxü
 —nhanagürü ga Cori ya Tupana.

.....

**Iraéutanüxügüxü narüporamae ga
 norü uanügü**

³⁹Rü yexguma yema
 Iraéutanüxügümaxã nüxü yaxuxgu ga

Moiché ga yema Cori ya Tupana
 namaxã nüxü ixuxü, rü guxüma ga
 nüma rü poraãcü nangechaügü. ⁴⁰Rü
 yema ga ngunexüarü moxüãcü rü
 paçmamaxüchi ínarüdagü rü inaxíachi
 nax ínachööchixüçax ga yema
 ínamáxpüxanexüwa. Rü nhanagürügü:
 —Marü núma tangügü. Rü aixcuma nixí
 nax chixexü taxüxü, notürü i nhuxmax
 rü marü ítamemare nax nawa ixíxü i
 ngëma naane ga Cori ya Tupana tamaxã
 nüxü ixuxü —nhanagürügü. ⁴¹Notürü
 ga Moiché rü nhanagürü nüxü:
 —¿Tüxcüü tama naga pexññü i Cori ya
 Tupanaarü mu? Rü ngëma nagu
 perüxññüxü rü taxütáma mea pexü
 ínanguxuchi. ⁴²Rü tama name nax
 ipexíamaxü, erü ya Cori ya Tupana rü
 tama napexütágu. Rü ngëma perü
 uanügü rü tá pexü narüporamaegü.
⁴³Rü yéa pepexewa rü ngëma pexü
 nananguxëëgü i Amaréchitanüxügü, rü
 Canaáanecüãxgü nax pemaxã nügu
 nadaixüçax rü pexü nayuxëëxüçax. Erü
 pema rü nüxna pexígachi ya Cori ya
 Tupana rü ngëmacax i nüma rü marü
 tama pexütawa nangexma —nhanagürü.
⁴⁴Rü nüma ga Moiché rü yema
 ínapegüxügutama narüxãüx namaxã ga
 yema baú ga Tupanaarü mugü nawa
 yexmaxü. Notürü ga nümagü ga
 Iraéutanüxügü rü ínachööchiana ga
 maçpúneanewa. ⁴⁵Notürü yexguma
 yéma nangugügu rü nümagü ga
 Amaréchitanüxügü rü Canaáanecüãxgü
 ga yexma áchiügüxü rü nanadai. Rü
 nawe nangëgü rü nhuxmata Ómawa
 nayawogü. Rü yemaacü nüxü
 narüporamaegü.

.....

Tama Moichéga naxínü ga Coré

16 ^{1,2}Rü Moichémaxã nanu ga wüxi ga Lewítanüxü ga Corégu áégaxü. Rü nüma ga Coré ga Yichá nane rü Coáchitaxa nixí. Rü Coréwa naxügü ta ga tamaepüx ga yatügü ga Rubéütanüxü, ga Datáü rü Abiráü ga Eliábi nanegü, rü Óü ga Peréchi nane. Rü yemawaama nügü naxügüxëxë ga 250 ga Iraéutanüxügü ga áëxgacügü ixígüxü ga duüxügümaxã icuaxgüxü rü duüxügü mea naga ñnüexü. ³Rü guxüma ga yemagü rü nangutaquexegü rü Moichémaxã rü Aróumaxã narüxutagagü rü nhanagürügü: —Marü tama nixí nax pexica tomaxã ipecuáxü, yerü ga Tupana rü guxãxüma nixí ga nadexü. Rü ngëmacax ya Cori ya Tupana rü tamaxã nanuxma i guxãma i yixemax. ¿Rü tüxcüü i pemax i Tupanaarü duüxügüétüwa pegü pexügüxëxëchaü? —nhanagürügü. ⁴⁻⁵Rü yemaxü naxínügu ga Moiché rü nhaxtíanegu nayangücuchi rü Coréxü rü yema nawe rüxixüxü nhanagürü: —Moxü päxmama rü nüma ya Cori ya Tupana rü tá tüxü nüxü nacuaxëxë rü texë tixí ya noxrü ixíxe rü tüxü naxunetaxe nax napëxewa tayaguxüçax i ámaregü —nhanagürü.

.....

¹²Rü nhüxüchi ga Moiché rü naxçax nangema ga Datáü rü Abiráü ga Eliábi nanegü ixígücü. Notürü ga nümagü rü Moichéxütawa namugagü rü nhanagürügü: —Tama cuxütawa taxíxchaü. ¹³¿Ëxna cuxçax rü wüxi ga ñnüca nixí ga toxü nax ícugaxüxü nawa ga Eyítuane ga mexü ga ñna taguma

ítaxuxüwa nax nuxã ínachianexügu toxü cuyuexëëxüçax? ¿Rü ngëmaacü i cunaxwaxexü nax torü áëxgacü quixixü? ¹⁴Rü tama aixcuma nixí i nawa toxü cugagüxü i ngëma naane i mexü i ñna taguma ítaxuxüwa, rü tama toxna cuyaxächigü i torü naane rü úwanecügü. ¿Rü cuma nagu curüxínügu rü nhaa duüxügü rü ningexetü nax cuma ícunaxwaxexüwa cunagagüxüçax? Rü taxütama cuxütawa taxí —nhanagürügü. ¹⁵Rü yexguma ga Moiché rü poraäcü nanu, rü Cori ya Tupanaxü nhanagürü: —Tama chanaxwaxë i nüxü cunayaxu i ngëma duüxügüarü ámaregü. Erü chama rü taguma nhuxgu wüxi i norü búru nüxna chayaxu, rü bai i nhuxgu wüxíemaxã chixexü chaxü —nhanagürü. ¹⁶Rü nhüxüchi Coréxü nhanagürü: —Moxüarü ngunexügu rü chanaxwaxë i nua Cori ya Tupanapëxewa pexí namaxã i cutanüxügü. Rü Aróü rü tá ta nangexma. ¹⁷Rü guxãma i pema i 250 i duüxügü pexígüxü, rü name nixí i wüxichigü nua penange i perü pumáratëxearü guruxü i pumáratëxemaxã pexüäcuxü. Rü Aróü rü ta ngëxgumarüxü tátama nanaxü —nhanagürü. ¹⁸Rü yemaacü wüxichigü nanayauxgü ga norü pumáratëxearü guruxü. Rü áwe ga naicümaxã nayaxüäcu rü nhüxüchi pumáratëxë naétü nagügü. Rü yemaacü Tupanapataarü ñaxgu nayachigü namaxã ga Moiché rü Aróü. ¹⁹Rü nüma ga Coré rü Moichémaxã rü Aróumaxã nananuexëxë ga duüxügü. Rü yemacax Tupanapatapëxegu nangutaquexegü ga guxüma ga yema duüxügü. Rü

Tupanaarü üüne rü naxçax nangox.
²⁰⁻²¹Rü nüma ga Cori ya Tupana rü Moichémaxã rü Aróúmaxã nhanagürü: —¡Pexígachi natanüwa i ngêma duũxügü! Erü nhuxmatátama chanadai —nhanagürü. ²²Notürü nüma ga Moiché rü Aróú rü Tupanapexegu nhaxtúanegu nanangücuchitanü rü nhanagürügü nüxü: —Pa Tupanax, cuma nax cunamaxêxêxü i guxüma i duũxügü, rü tama name i wüxitama i duũxüarü chixexügagu rü guxüma i duũxügümaxã cunu —nhanagürügü. ²³⁻²⁴Rü nüma ga Cori ya Tupana rü Moichéxü nangãxü rü nhanagürü: —¡Namaxã nüxü i xu i guxüma i Iraéutanüxügü rü ínachoxü nawa ya yima napatagü ya Coré rü Datáü rü Abiráü nawa ngêxmagüne! —nhanagürü. ²⁵Rü yexguma ga Moiché rü inaxüächi. Rü nawe narüxí ga Iraéutanüxügüarü ãëxgacügü. Rü Datáü rü Abiráü íyexmagüxüwa naxí. ²⁶Rü nüma ga Moiché rü duũxügümaxã nüxü nixu rü nhanagürü: —¡Nüxna pexígachi ya napatagü i nhaa duũxügü i chixexügu rüxünüexü! ¡Rü taxütáma nüxü pedáu i norü ngêmaxügü nax tama naxruxü norü chixexügagu peyuexüçax! —nhanagürü.

.....

³¹Rü yexguma Moiché rüchianegu ga nax yadexaxü, rü ga waixümü rü ningex napatatüüwa ga yema duũxügü. ³²Rü yexma nayicu ga guxüma ga yema duũxügü ga Coréweama rüxixü, wüxigu namaxã ga naxacügü rü naxmaxgü rü guxüma ga norü yemaxügü. ³³Rü maxêxüma yema waixümü ga ingéxügu nayicu namaxã ga norü yemaxügü. Rü

nhuxüchi ga yema waixümü rü nüguna naxü. Rü yemaacü yema Iraéutanüxügütanüwa inayarüxo ga yema duũxügü.

.....

⁴¹Rü yemaarü moxüácü rü guxüma ga yema Iraéutanüxügü rü inanaxügüe ga Moiché rü Aróúchiga nax chixri yadexagüxü. Rü nhanagürügü: —Pema rü penadaimare i nhaa Cori ya Tupanaarü duũxügü —nhanagürügü. ⁴²Rü guxüma ga yema duũxügü rü Moichéxü rü Aróúxü ínachomaeguächi rü yéma niporagatanücüxü. Notürü ga nüma ga Moiché rü Aróú rü Tupanapatawaama naxí. Rü yexgumatama yema caxixü ga Cori ya Tupana nawa yexmaxü rü napataétügu ínaxüxí, rü norü üünemaxã nayadüxü. ⁴³⁻⁴⁴Rü nüma ga Moiché rü Aróú rü Tupanapataarü ücuchicawa nangugü rü yexma nayachigü. Rü nüma ga Cori ya Tupana rü Moichéxü nhanagürü: ⁴⁵—¡Pexígachi natanüwa i ngêma duũxügü, erü nhuxmax tátama chanadai! —nhanagürü. Rü nüma ga Moiché rü Aróú rü yexgumatama nhaxtúanegu nayangücuchitanü. ⁴⁶Rü nüma ga Moiché rü Aróúxü nhanagürü: —¡Nua nange i curü pumáratexearü guruxü, rü áxwe i naxünagüarü guruxüwa cuyaxucümaxã naxüácü, rü nhuxüchi pumáratexë ngêxma ta nagü! ¡Rü nhuxüchi paxa duũxügü íngexmagüxüwa naxü rü ngêma duũxügüçax nüxna nachogü ya Tupana nax nüxü nüxü nangümaxüçax i norü chixexügü! Erü nüma ya Cori ya Tupana rü poraacü nanuxüchi, rü ngêma daaweane i namaxã nadaiaxü rü marü

inaxügü —nhanagürü. ⁴⁷Rü nüma ga Aróü nanaxü ga yema Moiché namaxã nüxü ixuxü. Rü paxa inanhaächi rü yema duïxügü íngutaqexexüwa naxü. Rü yema daaweane ga Tupana yéma muxü rü marü natanüwa nangu ga duïxügü rü marü poraãcúma ta nayue. Rü yexguma ga nüma ga Aróü rü yema pumáratexearü guruxügu nanagü ga pumáratexe, rü Tupanana naca nax duïxügüaxü nüxü yanangümaxüçax ga norü chixexügü. ⁴⁸Rü nhuxüchi ga nüma ga Aróü rü yema maxëxü rü yema marü yuexümachatexegu nachí. Rü yexguma ínayachaxächí ga yema daaweane. ⁴⁹Notürü marü 14,700 ga duïxügü nixí ga yuexü namaxã ga yema daaweane. Rü naétü nixí ga yema nüxíra marü yuexü ga Coréwe rüxíxü ga tama Moichéga ínuechaüxü. ⁵⁰Rü yexguma marü iyanaxoxgu ga yema daaweane, rü nüma ga Aróü rü wenaxarü Tupanapataçax natáegu ga Moiché íyexmaxüwa.

.....

**Nutawa nichuxchu
ga dexá ga Meribáwa**

20 ¹Rü tauncüarü ügüarü tauemacügu nixí ga Iraéutanüxügü ga chianexü ga Chígu áégaxüwa nangugüxü. Rü nachica ga Cáyigu áégaxügu narücho. Rü yexma nixí ga nayuxü ga Moiché naeyax ga Miriáü rü ngíxü nataxgüxü. ²Notürü ga duïxügü rü nüxü nataxuma ga dexá, rü yemacax nangutaqexegü rü Moichémaxã rü Aróümaxã narüxutagagü. ³Rü nhanagürügü Moichéxü: —Narüimemae chi nixí ga

wüxigu namaxã tayuexü ga yema tatanüxügü ga Cori Tabéragu daixü. ⁴¿Rü tüxcüü nixí i nua toxü pegagüxü i toma i Cori ya Tupanaarü duïxügü nax tixígüxü? ¿Ëxna penaxwaxe nax nua tayuexü wüxigu namaxã i toxünagü? ⁵¿Rü tüxcüü ga toxü ípegaxüxü ga Eyítuanewa nax nhaa nachica i chixexü rü äücúmaxüwa toxü pegagüxüçax? Erü nua rü taxucürüwama taxacü nuxã tato, rü nataxuma i iguéra, rü úwa, rü boxra. Rü dexá rü nataxu i nawa ixaxexü —nhanagürügü. ⁶Rü nüma ga Moiché rü Aróü rü nüxna nixígachi ga yema duïxügü, rü Tupanapataarü ücuchicawa naxí, rü yexma nanangücuchitanü. Rü yéma nixí ga Tupanaarü üüne ga naxçax nangóxü. ⁷⁻⁸Rü nüma ga Cori ya Tupana rü nhanagürü Moichéxü: —¡Nayaxu ya yima curü naixmenaxã rü nhuxüchi cuenexë ya Aróüarü ngüxëemamaxã nangutaqexexë i duïxügü! ¡Rü nhuxüchi guxüpexewa rü yimá ngéma ngëxmacü ya nutamaxã nüxü ixu nax dexá pexna naxäxüçax! Rü tá nüxü cudau nax yimá nutawa tá dexá yagoxüchiüxü nax ngëmawa naxaxegüxüçax i nümagü i duïxügü rü naxünagü —nhanagürü. ⁹Rü nüma ga Moiché rü Cori ya Tupanapatawa nanayaxu ga guma naixmenaxã yema nümatama namuaxürüxü. ¹⁰Rü nhuxüchi ga Moiché rü Aróü rü gumá nutaxütagu nanangutaqexexë ga duïxügü, rü nhanagürü nüxü: —¡Iperüxínüe, Pa Duïxügü i Tama Ixínüechaxüxü! ¿Rü taxütá ëxna i nhuxmax i nüxü pedauxü nax daa nutawa dexá pexçax ngóxü nax nawa pexaxegüxüçax? —nhanagürü. ¹¹Rü

yema nhaxguwena ga Moiché rü guma naixmenaxāmaxā naxunagüchacüxü, rü taxrexpüxcüna guma nutawa nanacuaxca. Rü taxü ga dexá yéma inayagoxüchixü. Rü yemaacü ga duüxügü rü naxünagü rü naxaxegü. ¹²Notürü nüma ga Cori ya Tupana rü Moichéxü rü Aróuxü nhanagürü: —Nhuxma nax tama mea chagu peyaxögüxü rü tama choxü pecuaxüügüxü i napexewa i ngēma Iraéutanüxügü, rü ngēmacax i pema rü marü taxütáma nhaa duüxügümaxā nawa pengugü i ngēma naane i pexna chaxāxü —nhanagürü ga Tupana.

Āxtapechicünaxā ga bróchenaxcax

21 ⁴Rü nüma ga Iraéutanüxügü rü ínachoxü nawa ga guma maxpúne ga Oré rü Már ga Dauchiüxüwaama naxí. Rü yexmaama ínayachoegu nax tama Edóüanewaama nachopetüxücax. Rü yexguma namagu naxiyane ga duüxügü rü marü tama Moichéga naxínüechaü. ⁵Rü yemacax inanaxügüe ga Moichéchiga rü Tupanachiga nax yadexagüxü. Rü nhanagürügü: —¿Tüxcüü ga pema ga Eyítuanewa ga toxü ípegaxüxü? ¿Ēxna nua toxü pegagü nax nhaa nachica i chianexü i taxüema íxāpataügu toxü peyuexēxücax? Nhuxma rü toxü nataxu i dexá rü òna. Rü nhaa òna i chixemarexü i tangōxgüxü rü marü düxwa nüxü tarüchaue —nhanagürügü. ⁶Rü yemacax ga nüma ga Cori ya Tupana rü naxcax yéma nanamugü ga āxtapegü nax duüxügüxü nangōxgüxücax. Rü yemamaxā rü

muxüma ga Iraéutanüxügü rü nayue. ⁷Rü nüma ga duüxügü rü Moichécax naxí rü nhanagürügü nüxü: —Aixcuma chixexü taxügü yerü chixri cuchiga rü Corichiga tidexagü. ¡Rü nüxna naxcax naca ya Cori ya Tupana nax toxna yaxígachixēēaxücax i nhaa āxtapegü! —nhanagürügü. Rü nüma ga Moiché rü Cori ya Tupanana naca nax Iraéutanüxügüaxü nüxü nangümaxücax ga norü chixexügü. ⁸Rü nüma ga Cori ya Tupana rü Moichéxü nangāxü rü nhanagürü nüxü: —¡Ēcü wüxi i āxtapechicünaxā naxü rü nhuxüchi wüxi i naimaxā napuxpaweru, rü ngēxma nachonagünüta! Rü ngēxguma texéxü nangōxgux i wüxi i āxtape, rü nüxü tadawenü i ngēma āxtapechicünaxā i ngēxma chonagüxü, rü ngēmaacü taxütáma tayu —nhanagürü. ⁹Rü nüma ga Moiché rü nanaxü ga wüxi ga āxtapechicünaxā ga bróchenaxcax. Rü naimaxā nanapuxpaweru rü yexma nachonagünüta. Rü yexguma texéxü nangōxgux ga āxtape, rü yema bróchenaxcax ga āxtapexü tadawenü, rü yemaacü tama tayu.

Baráqui rü Baraáucax nangema

22 ¹Rü nüma ga Iraéutanüxügü rü inaxí rü Moábianearü metachinüxügu nayapegü ga natü ga Yurdáuarü léstegu ga ñane ga Yericóarü toxmaxtagu. ²Rü nüma ga Moábianearü āēxgacü ga Baráqui ga Yipúru nane rü nüxü nacuáchiga ga nhuxacü yema Iraéutanüxügü rü Amuréutanüxügüxü naporamaegüxü. ³Rü yexgumarüxü ta ga yema norü duüxügü ga

Moábianecüãxgü, rü namuïe ga yexguma yema Iraéutanüxügüxü nadaugügu ga nax namuxüchixü. ⁴⁻⁵Rü yemaçax ga yema Moábianecüãxgü rü Miyiáüanecüãxgüarü ãëxgacügümaxã nidexa rü nhanagürügü nüxü: —Guxüma i nhaa duïxügü i Iraéutanüxügü rü tá nanapaxëxë i tóru naane, nhama wüxi i woca i maxë naguxëëxürüxü —nhanagürügü. Rü yemaçax ga nüma ga Moábianearü ãëxgacü ga Baráqui rü Tupanaarü orearü uruxü ga Baraáü ga Beú nanecax nangema. Rü nüma ga Baraáü rü ñane ga Pétucüãx nixü rü taxtü ga Eufatéarü ngaicamagu naxächüü ga Amáxüanewa. Rü nüma ga Baráqui rü norü duïxügüxü namu nax Baraáümaxã rü nhagüxüçax: “Eyítuanewa ne naxü i duïxügü i chauchixüane yapaxëëgüxü. Rü nhüxmax rü marü chorü toxmãxtagu napegü. ⁶Rü paxa nua naxü rü chaugagu chixexü namaxã naxuegu i ngëma duïxügü! Erü tá toxü narüporamaegü. Rü bexmana ngëmaäcü tá choxü natauxcha nax nüxü charüporamaexü rü íchawoxüxü i nua chauchixüanewa. Rü chama rü meama nüxü chacuax rü ngëxguma taxacümaxã mexü cuxueguxgu rüexna chixexü namaxã cuxueguxgu, rü guxüguma aixcuma ningü”, nhanagürü. ⁷Rü yexguma ga yema orearü ngeruügü ga Moábianecüãxgü rü Miyiáüanecüãxgü rü diërumaxã Baraáüxütawa naxü nax naxütanügüaxüçax ga chixexü Iraéutanüxügümaxã naxueguxüçax. Rü yexguma Baraáüxütawa nangugügu, rü namaxã nüxü nixugügu ga Baráquiarü ore. ⁸Rü nüma ga Baraáü rü nanangãxü

rü nhanagürü nüxü: —¡Ëcü nuxã pepegü i nhaa chütaxü! Rü moxü paxmama tá pexü changãxü i ngëma Tupana chamaxã nüxü ixuxüãcüma —nhanagürü. Rü yemaacü ga yema Moábianearü ãëxgacüarü orearü ngeruügü rü yexma napegü.

.....

¹²Rü nüma ga Tupana rü Baraáümaxã nüxü nixu rü nhanagürü: —Tama chanaxwãxe i nawe curüxü rü chixexü namaxã cuxuegu i ngëma Iraéutanüxügü, erü ngëma duïxügü rü chamatama marü mexü namaxã chaxuegu —nhanagürü. ¹³Rü moxüãcü paxmama ínadaxgu ga Baraáü rü namaxã nüxü nixu ga yema duïxügü ga Baráqui yéma mugüxü rü nhanagürü nüxü: —¡Ëcü pewoegu pechixüanecax! Rü Cori ya Tupana rü tama nanaxwãxe nax pewe charüxüxü —nhanagürü. ¹⁴Rü yema duïxügü ga Moábianecüãxgü rü nawoegu ga Baráqui íyexmaxüwa, rü namaxã nüxü nixugüe rü nhanagürügü: —Nüma i Baraáü rü tama towe narüxü —nhanagürügü. ¹⁵Notürü nüma ga Baráqui rü tama inaxünu, rü wenaxarü togü ga norü duïxügü yéma Baraáüxütawa namugü. Notürü yemagü rü yema nüxüfra yéma namugüxüxü narüumuae rü nhüxüchi yemaétüwa ügüxü nixügü. ¹⁶Rü nüma ga yema ãëxgacügü rü Baraáüxütawa naxü rü nhanagürügü nüxü: —Nüma ya Baráqui ya Chipúru nane rü moxë cuxçax nua namu rü nhanagürü: “¡Tauxü i cuxoxü nax chauxütawa cuxüxü! ¹⁷Rü chama rü poraäcü cumaxã chataãxë rü mea tá cuxü chayaxu. Rü tá cuxna chanaxã i guxüma i taxacü i naxçax ícuxçaxaxü.

ĩĒcũ nua naxũ rũ choxũ rüngũxĕxĕ nax chixexũ namaxã cuxueguxĩcax i nhaa Iraeütanũxũgũ!” nhanagürũ i nüma i Baráqui —nhanagürũgũ. ¹⁸Notürũ nüma ga Baraáũ rũ nanangãxũ rũ nhanagürũ: —Woo chi Baráqui choxna naxãxgu i guxũma i úiru rũ diëru i napatawa ngĕxmaxũ notürũ i chama rũ taxucürũwa taxacu chaxũ, rũ woo taxũ rũ woo íxraxũ, ega tama Cori ya Tupanaarũ mu yixĩgu. ¹⁹Notürũ name nixĩ i pema rũ ta rũ nuxã pepegũ i nhaa chũtaxũ, erũ nhaa chũtaxũgu tá nüxũ chacuax rũ ngoxi nhuxmagu rũ taxacũxũ tá chamaxã yaxu ya Cori ya Tupana —nhanagürũ. ²⁰Rũ yema chũtaxũgu rũ nüma ga Tupana rũ Baraáũcax nangox rũ nhanagürũ nüxũ: —Nhuxma nax cuxcax nua naxĩxũ i ngĕma yatũgũ rũ ĩcũ, írũda rũ nawe ruxũ! Notürũ ngĕma chama cumaxã nüxũ chixuxũxica tátama nixĩ i cuxũxũ —nhanagürũ.

**Tupanaarũ orearũ ngeruxũ i
dauxũcüãx rũ Baraáũcax nangox**

²¹Rũ moxũãcü paxmama rũ ínaruđa ga Baraáũ rũ norũ búru naxũxmaxwexe rũ nawe narũxũ ga yema ãĕxgacũgũ ga Moábianecũãxgũ. ²²Rũ nüma ga Baraáũ rũ norũ búruétũgu nixũ, rũ taxre ga norũ duũxũgũ ínaxaxũmũcũgũ. Notürũ ga Tupana rũ nanu. Rũ yemacax nixĩ ga Tupanaarũ orearũ ngeruxũ i dauxũcüãx ga Baraáũarũ búruxũ yachiyepeĕxũ nax taxuacũ naxũpetũxũcax. ²³Rũ yema búru rũ nüxũ nadau ga yema Tupanaarũ orearũ ngeruxũ ga norũ taramaxã namagu chixũ. Rũ yemachaxwa namana ínaxũcu rũ ínangemaanexũwa naxũmare.

Notürũ nüma ga Baraáũ rũ tama nüxũ nadau ga yema Tupanaarũ orearũ ngeruxũ rũ yemacax nanacuaxi ga norũ búru nax namawa naxũxũcax. ²⁴Rũ yemacax nüma ga Tupanaarũ orearũ ngeruxũ i dauxũcüãx rũ yema nama íxãxtapũxanexũgu rũ íyaxixyemaxũgu nayachi ga úwanecũ íyixĩxũwa. ²⁵Rũ yema búru rũ wenaxarũ nüxũ nadau ga yema Tupanaarũ orearũ ngeruxũ i dauxũcüãx rũ yemacax naxtapũxwaama naxĩxpetũ rũ Baraáũxũ yema nayaxũxtũpara. Rũ nüma ga Baraáũ rũ wenaxarũ nanacuaxi. ²⁶Notürũ nüma ga Tupanaarũ orearũ ngeruxũ i dauxũcüãx rũ nüxĩra napĕxewaama naxũ rũ yema poraãcü íyaxixyemaxũgu nayachi ga ngextá taxuwama ínaxũpetũxũwa. ²⁷Rũ yema búru rũ wenaxarũ nüxũ nadau ga yema Tupanaarũ orearũ ngeruxũ i dauxũcüãx, rũ yemacax narũnhuãchi yerũ taxuwama naxũpetũéga. Rũ yexguma ga Baraáũ rũ nanu, rũ poraãcü nanacuaxi. ²⁸Rũ yemacax ga Tupana rũ nayadexaxĕxĕ ga yema búru nax Baraáũmaxã yadexaxũcax, rũ nhanagürũ: —¿Taxacu cumaxã chaxũ? Rũ nhaamaxã rũ marũ tamaepũxcũna nixĩ nax choxũ cucuaxixũ —nhanagürũ. ²⁹Rũ nüma ga Baraáũ nanangãxũ ga norũ búru rũ nhanagürũ nüxũ: —¿Tũxcüũ i chagu quidauxcũraxũxũ? Rũ ngĕxguma chi chaxãarũ cũchĩãxgux rũ nhuxmax chitama nixĩ i nuxã cuxũ chimáxũ —nhanagürũ. ³⁰Notürũ ga yema búru rũ nhanagürũ nüxũ: —Chama nixĩ i curũ búru i guxũguma chautagu cuxaunagũaxũ ega ngextá cuxũũxgu. Cuma rũ meama nüxũ cucuax rũ taguma nhuxgu nhuxmarũxũ cumaxã

chixĩ —nhanagürü. Rũ nũma ga Baraáũ rũ nanangãxũ rü: —Aixcuma nixĩ i ngẽma —nhanagürü. ³¹Rũ yemaçax ga Cori ya Tupana rũ Baraáũxũ nüxũ nadauxẽxẽ ga yema norü orearü ngeruxũ i dauxücüãx ga namaarü ngãxũgu chixũ norü taramaxã. Rũ yemaxũ nadaxgux ga Baraáũ rũ nhaxtüanegu nanangücuchi. ³²Notürü ga Tupanaarü orearü ngeruxũ i dauxücüãx rũ Baraáũxũ nhanagürü: —¿Tüxcüũ tamaepüxcüna cuyamaçax i ngẽma curü búru? Rũ chama nixĩ i cuxũ chichiyepẽxũ, erü ngẽma ngẽma nax cuxũxũ rü tama chorü me nixĩ. ³³Rũ ngẽma curü búru rü choxũ nadau rü ngẽmaçax tamaepüxcüna choxũ ínaxüeguãchi. Rũ ngëxguma chi taxüchima choxũ ínaxüeguãchigu, rü marü chi cuxũ chimax notürü ngẽma curü búru rü chi chanamaxẽxẽ —nhanagürü. ³⁴Rũ nũma ga Baraáũ rü Tupanaarü orearü ngeruũxũ nangãxũ rü nhanagürü: —Chixexũ chaxü erü tama nüxũ chacuax nax cuma yixixũ i choxũ quichiyepẽxũ. Rũ ngëxguma cuxçax nachixegu nax ngẽma chaxũxũ rü tá chatáegu —nhanagürü. ³⁵Notürü ga Tupanaarü orearü ngeruxũ i dauxücüãx rü nanangãxũ rü nhanagürü: —Marü name i nawe curüxü i ngẽma yatügü, notürü ngẽma cumaxã nüxũ chixuxũxica tátama nixĩ i nüxũ quixuxũ —nhanagürü. Rũ yemaçax ga Baraáũ rü nawe narüxü ga yema ãëxgacügü ga Baráqui yéma mugüxũ.

Baráqui rü Baraáũxũ mea nayaxu

³⁶Rũ yexguma Baráqui nüxũ cuáchigagu ga Baraáũ nax yangaicaxũ, rü inaxüãchi rü wüxi ga ñane ga

Moábianecüãxgüarügu nüxũ nayangau. Rũ guma ñane rü natü ga Anóũcutüwa nayexma ga Moábichixüãnearü üyeanewa. ³⁷Rũ nhanagürü nüxũ: —Muëpüxcüna chanamu nax cuxçax yacagüxüçax. ¿Rü taxacüçax i tama nua cuxüxchaũxũ? ¿Ëxna nagu curüxínü rü taxüchima mea cuxũ chayaxu? —nhanagürü. ³⁸Rũ nũma ga Baraáũ rü nanangãxũ rü nhanagürü: —Düçax, marü nua chaxü nax cuxũ íchayadauxüçax. Notürü i chama rü choxũ nataxu i pora nax chauechamatama taxacürü orexü chixuxüçax. Erü chama rü ngẽma Tupana chamaxã nüxũ ixuxüxicatama tá nixĩ i nüxũ chixuxũ —nhanagürü. ³⁹Rũ Tupanaarü orearü uruxũ ga Baraáũ rü ãëxgacü ga Baráquiwe narüxü nhüxmata Quiriáchi-Uchuáchiwa nangugü. ⁴⁰Rũ yéma ga Baráqui rü norü duüxũgüxũ namu nax wocagü rü carnérugü nadaixüçax. Rũ nhüxüchi Baraáũxütawa rü yema togü ga ãëxgacügü ga íyaxümücügüxütawa nanamugü ga nhuxre ga namachi nax nüxna naxãgüãxüçax. ⁴¹Rũ moxüãcü rü nũma ga Baráqui rü Baraáũxũ ínayadau. Rũ maxpüne ga Bamó-Chibaágu nanaxínagüxẽxẽ nax yéma nüxũ nadauxüçax ga Iraéutanüxũgü ipegüxüwa.

23 ¹Rũ yexguma ga nũma ga Baraáũ rü nhanagürü nüxũ: —¿Ëcü 7 i ãmarearü guchicaxü nuxã naxü, rü ínayauxũ i 7 i wocaxacügü rü 7 i carnérugü nax chauxçax ínamemarexüçax! —nhanagürü. ²Rũ nũma ga Baráqui rü nanaxü ga yema Baraáũ namaxã nüxũ ixuxũ. Rũ wüxigu

nügümaxã rü nayamaxgü rü nayagugü ga wüxi ga wocaxacü rü wüxi ga carnéru ga wüxichigü ga naxûnaarü guchicaxüwa.

**Baraáü rü mexü
Iraéutanüxügümaxã naxuegu**

³⁻⁴Rü nhuxüchi Baraáü rü nhanagürü Baráquixü: —jĒcü nuxã naxûnaarü guchicagüxütägu rüxãüx! Rü chama rü tá cuxna chixügachi nax íchayadauxüçax ngoxi ngêma çauxçax naxü ya Cori nax ngêxma choxü nangauxüçax. Rü nhuxüchi tá cumaxã nüxü chixu i ngêma chamaxã nüxü yaxuxü —nhanagürü. Rü nüma ga Baraáü rü wüxi ga maxpúne ga chianenewa naxü, rü yéma nixi ga Tupana naxçax ngóxü. Rü nüma ga Baraáü rü nhanagürü Tupanaxü: —Marü chanaxü i 7 i ãmarearü guchicaxü, rü wüxichigü i ngêma guchicaxüwa rü chayagu i wüxi i wocaxacü rü wüxi i carnéru —nhanagürü. ⁵Rü yexguma ga Cori ya Tupana rü Baraáümaxã nüxü nixu ga wüxi ga ore ga Baráquicax ixixü, rü nhuxüchi nhanagürü nüxü: —jĒcü natáegu i naxütawa i Baráqui rü namaxã nüxü ixu i ngêma ore i cumaxã nüxü chixuxü! —nhanagürü. ⁶Rü nüma ga Baraáü rü natáegu rü Baráquixü inayangau ga yexma naxûnaarü guchicagüxütägu chigüxü namaxã ga guxüma ga äëxgacügü ga Moábianecüãxgü. ⁷Rü nüma ga Baraáü rü nüxü nixu ga nhaa ore rü nhanagürü: —Yéma yáxüwa ínamaxpúneanexüwa i Aráüwa choxü ne naxüxëxë ya Baráqui ya Moábianecüãxgüarü äëxgacü. Rü

nhanagürü choxü: “jRü nua naxü rü chixexü namaxã naxuegu i ngêma Iraéutanüxügü nax ngêmaacü chixexü namaxã ngupetüxüçax!” nhanagürü choxü. ⁸jNotürü nhuxäcü tá chixexü namaxã chaxuegu i ngêma duüxügü i Tupana tama chixexü namaxã ueguxü? jRü nhuxäcü tá chixexügu namaxã charüxínü i ngêma duüxügü i Cori ya Tupana tama chixexügu namaxã rüxínüxü? ⁹Rü nua daa maxpúnechitaeruwa rü meama nüxü chadau i ngêma Iraéutanüxügü. Rü daa maxpúnetapexewa rü meama nüxü chadawenü. Rü chanangugü rü duüxügü i nügütanüxügüxicatama ixächiügüxü nixigü. Rü tama togü i duüxügümaxã nawüxigu erü tama togü i duüxügümaxã nügü narüxücu. ¹⁰Rü nhama taxacü i ätexexürüxü namuxüchi jrü texé tá tayaxugü? jRü texé tá nüxü cuáxü i norü mu? Chierü ngêma duüxügü i mexürüxü chixixgu nhuxmatáta chayux, rü ngémawena rü Tupana ngêma duüxügüxü nadauxürüxü, choxü nadaux nax chamexü —nhanagürü. ¹¹Rü yexguma ga Baráqui rü Baraáüxü namuama yerü ga Baraáü rü tama nanaxü ga yema nüxna naxçax nacaxaxü, rü nhanagürü: —jTaxacü nixi icuxüxü? Rü chama rü cuxçax nua changema nax chixexü namaxã cuxueguxüçax i nhaa chorü uanügü, notürü i cuma rü mexü namaxã cuxuegu —nhanagürü. ¹²Rü nüma ga Baraáü rü nanangäxü rü nhanagürü: —jTama êxna nüxü cucuax nax cumaxã nüxü chixuxü rü ngêma Tupana chamaxã nüxü ixuxüxicatama tá yixixü i ngêma nüxü chixuxü? —nhanagürü.

¹³Notürü nüma ga Baráqui rü Baraáúxü nicaxaxüchigüama rü nhanagürü: —¡Ëcü nua toxnamana chawe rüxü, rü ngéma tá nixí i naxpechinüguxica tátama cudauxü ya yima norü ïane i ngéma duüxügü, notürü taxütáma guxügu cudauane i norü ïanewa! Rü chanaxwaxe nax ngéma chixexü namaxã cuxueguxü —nhanagürü. ¹⁴Rü nüma ga Baráqui rü wüxi ga naane ga dauxütaechica ga Yóffgu áegaxüwa nanaga ga maxpúne ga Píगतapexewa. Rü yexma nanaxü ga 7 ga âmarearü guchicaxü. Rü wüxichigüwa nayagu ga wüxi ga wocaxacü rü wüxi ga carnéru. ¹⁵Rü yema nachicawa rü nüma ga Baraáü rü nhanagürü Baráquixü: —¡Ëcü nua nhaa naxüna íguxüxütagu rüxâüx! rü chama rü tá yoxni Tupanamaxã charüdexa —nhanagürü. ¹⁶Rü nüma ga Cori ya Tupana rü yexma Baraáúxü nayangau, rü namaxã nüxü nixu ga yema ore ga Baráquimaxã tá nüxü yaxuxü. Rü nhanagürü ta nüxü: —¡Ëcü natáegu naxütawa i Baráqui rü namaxã nüxü ixu i ngéma cumaxã nüxü chixuxü! —nhanagürü. ¹⁷Rü nüma ga Baraáü rü natáegu. Rü Baráquixü inayangau ga naxüna íguxüxütagu chixü namaxã ga äëxgacügü ga Moábianecüäxgü. Rü nüma ga Baráqui rü Baraáüna naca rü nhanagürü: —¿Rü nhuxü nhaxü cuxü ya Cori ya Tupana? —nhanagürü. ¹⁸Rü yexguma ga nüma ga Baraáü rü nüxü nixu ga nhaa ore, rü nhanagürü: —Pa Baráqui ya Chipúru Nane Íxícüx ¡dücax, mea choxü íruxínü! ¹⁹Rü Tupana rü tama duüxügü nagu rüxínüxügu narüxínü, rü taguma nidora rü taguma nanaxüchicüxü i norü ïnü.

Rü ngëxguma taxacüü yaxuxgu rü aixcumama nanaxü. Rü ngëxguma taxacücax inaxunetagu rü aixcumama nayanguxëxë. ²⁰Rü chama rü choxü namu ya Tupana nax mexü namaxã chaxueguxücax i ngéma duüxügü i Iraéutanüxügü erü nümatama ya Tupana rü mexü namaxã naxuegu rü ngëmacax i chama rü taxucürüwa chixexü namaxã chaxuegu. ²¹Rü taguma texéxü nawomüxëëgü i ngéma duüxügü rü taguma texémaxã chixexü naxügü i ngéma Iraéutanüxügü i Yacúarü duüxügü ixíxügü. Rü Cori ya norü Tupana rü natanüwa nangexma, rü nümagü rü norü äëxgaciücü nüxü nacuxgü —nhanagürü ga Baraáü.

²⁵Rü yexguma ga Baráqui rü nhanagürü Baraáúxü: —Nhuxma nax tama cuxü natauxchaxü nax chixexü namaxã cuxueguxü i ngéma Iraéutanüxügü, rü ngexrüma noxtacüma nax mexü namaxã cuxueguxü —nhanagürü. ²⁶Rü nüma ga Baraáü rü nanangaxü rü nhanagürü: —¿Tama ëxna nagu curüxínü nax marü cumaxã nüxü chixuxü rü ngéma Tupana chamaxã nüxü ixuxüxicatama tá yixixü i ngéma nüxü chixuxü? —nhanagürü. ²⁷Rü yexguma ga Baráqui rü nhanagürü nüxü: —¡Ëcü, nua toxnamana chawe rüxü! Rü bexmana ega ngéma nachicawa chixexü namaxã cuxueguxü i ngéma Iraéutanüxügü rü taxütáma nanu ya Tupana —nhanagürü. ²⁸Rü yemaacü ga Baráqui rü maxpúne ga Peúgu áéganewa Baraáúxü naga. Rü yéma nixí ga meama naétü idauxü ga guxüma ga yema chianexü. ²⁹Rü

yexguma ga nūma ga Baraáú rü nhanagürü nüxü: —¡Ëcü 7 i ãmarearü guchicaxü nuxã naxü, rü ínayauxü i 7 i wocaxacügü rü 7 i carnérugü nax cháuxcax ínamemarexüçax! —nhanagürü. ³⁰Rü nūma ga Baráqui rü nanaxü ga yema Baraáú namaxã nüxü ixuxü. Rü nayamax rü nayagu ga wüxi ga wocaxacü rü wüxi ga carnéru ga wüxichigü ga yema naxünaarü guchicaxüwa.

24 ¹Notürü nūma ga Baraáú rü marü nüxü nicuaxãchi rü Cori ya Tupana rü tagutãma chixexü Iraéutanüxügümaxã naxuegu. Rü yemaçax marü tama wena Tupanaxütawa naxü nax ore yayaxuxüçax noxrirüxü. Rü yema Iraéutanüxügü ípegüxügü nadawenümare.

Ore i mexü i Tupana Baraáúaxwa nüxü ixuxü

²Rü yexguma nüxü nadauyane ga yema Iraéutanüxügü nax nügütanüxüchigüãcuma naxãpatagüxü, rü Tupanaãxë ya Üünexü rü Baraáuna nangu rü namaxã inacuax. ³Rü yemaçax ga nūma ga Baraáú rü nüxü nixu ga nhaa ore nachiga ga Iraéutanüxügü, rü nhanagürü: —Nhaa nixí i chorü ore i chama i Peú nane i mearü dawenüácü chixixü. ⁴Rü ngëxguma Tupana choxü nüxü dauxëégux, rü nūma ya guxüétüwa ngëxmacü meama choxü nüxü nacuaxëxë i ngëma nax nhuxãcü tá yixixü i ngëma Iraéutanüxügü. ⁵Rü pemax, Pa Yacútanüxügüx rü nimexechi ya pepatagü. Rü pemax, Pa Iraéutanüxügüx, rü namexechi i ngëma

ípepegüxüwa. ⁶Rü pepatagü rü nhama temagü i máxchímüxüxürüxü nixígü. Rü ngëma ípepegüxüwa rü nhama orixnecü i natüpechinügu togüxürüxü nixígü. Rü pema rü nhama naigü i mexechixü i Tupanatama itogüxürüxü pexígü, rü nhama ocayiwagü i natüpechinüwa rüxügüxürüxü pexígü. ⁷Rü pemax, Pa Iraéutanüxügüx, rü tá pexü nangexma i taxütama i dexã nax nawa pexaxegüxüçax rü penetügü namaxã pimegüxüçax. Rü perü ãëxgacügü rü tá guxü i togü i ãëxgacügüétüwa nangexmagü, rü pechixüane rü tá naporaxüchi. ⁸Rü guma Tupana ga Eyítuanewa pexü ínguxüxëécü rü yimã tá nixí ya pora pexna ãcü. Rü pema i Iraéutanüxügü rü tá penadai i guxüma i nachixüanecüãxgü i perü uanügü ixígüxü. Rü tá ipenapóügüchinxã, rü tá pexnemaxã penadai. ⁹Rü ngëxguma ípecagügux nax pepeçax rü nhama wüxi i ai i pexürüxü tá pexígü nax taxúetãma tügü írúporaxü nax pexü ítabãixgüxüçax. ¡Rü mexü tüxü ngupetü ya yíxema mexü pemaxã ueguxe, Pa Iraéutanüxügüx, rü chixexü tüxü ngupetü ya yíxema chixexü pemaxã ueguxe! —nhanagürü ga Baraáú. ¹⁰Rü yemaçax naxínügu ga Baráqui rü poraãcü nanuxüchi Baraáúmaxã, rü napéxmexëãcúmaxã nhanagürü: —Chama rü cucçax changema nax chixexü namaxã cuxuegüxüçax i ngëma chorü uanügü, notürü marü tamaepüxcüna nixí nax mexü namaxã cuxuegüxü. ¹¹Rü narümemae nixí nax cuchüçax cutãegüxü. Chama rü marü ichaxuneta nax mexümaxã cuxü chatachigaxëëxü, notürü nūma ya Cori

ya Tupana rü tama nanaxwaxe nax
ngëma mexũ cumaxã chaxũũ
—nhanagürü.

.....

**Moábianecüãxgüarü tupana ga
Baá-Peúxũ nicuaxũxũgü ga
Iraéutanũxũgü**

25 ¹Rü yexguma Chitũũgu
naxãchiũũgü ga
Iraéutanũxũgü, rü yema norü
ngextũxücügü rü inanaxügüe ga
Moábianecüãxgüarü paxũgümaxã nax
namaxëxũ. ²Rü düxwa ga nüma ga
paxũgü rü norü tupanagüçax
ínangutaquexegüxũwa yema
ngextũxücügüxũ nagagü. Rü nüma ga
Iraéutanũxũgü rü natanüwa nachibüe
rü nhũxũchi yema Moábianecüãxgüarü
tupanaxũ nicuaxũxũgü. ³Rü yemaacü
muxũma ga yema Iraéutanũxũgü rü
nügü inaxãgü nax Baá-Peúxũ nax
yacuaxũũgüxũ. Rü yemaçax ga Cori ya
Tupana rü poraãcü Iraéutanũxũgümaxã
nanu. ⁴Rü yemaçax Moichëxũ
nhanagürü: —¡Ëcü nangutaquexexë i
guxũma i ngëma Iraéutanũxũgüarü
ãëxgacügü i nayauxgüxũ nax
Baá-Peúxũ yacuaxũũgüxũ! ¡Rü
chapexegu nadai i ngunecü rü
nhũxũchi naitanüwa
nachũxũquegüxë i naxũnegü nax
guxũma i duũxũgü nüxũ nadaugüxũçax!
Rü ngëxgumaxica tá nixĩ i
charüngüxmüxũ namaxã i ngëma
Iraéutanũxũgü —nhanagürü ga Tupana.
⁵Rü yexguma ga nüma ga Moiché rü
nanamu ga norü ngüxëëruũgü ga
ãëxgacügü ga wüxitücumüchigü ga
Iraéutanũxũgümaxã icuaxgüxũ, rü

nhanagürü nüxũ: —Rü wüxichigü i
pema rü tá penadai i ngëma
petanũxũgüchigü ixĩgüxũ i nügü
ixãgüxũ nax Baá-Peúxũ yacuaxũũgüxũ
—nhanagürü. ⁶Notürü yexguma
Moichëmaxã Tupanapataçxtüwa
nangutaquexegüga ga Iraéutanũxũgü
ga íxauxexũ, rü yexgumayane rü wüxi
ga Iraéutanũxũ rü wüxi ga ngexũ ga
Miyiãüanecüãxmaxã yéma naxüpetü
nax napatawa nagaaxũçax. ⁷Rü
yexguma yema yatũxũ nadaxgux ga
Finéya ga Ereachã nane ga chacherdóte
ga Aróútata, rü nixũgachi ga yema
Iraéutanũxũgü íngutaquexegüxũwa. Rü
nanayaxu ga norü wocae. ⁸Rü nawe
nangë ga yema yatü ga chixexũ üxũ
nhũxmata norü pechicawa. Rü yexma
nayatopetütanü ga yema taxre norü
wocae. Rü yemaacü inarüxo ga
yema dawean. ⁹Notürü 24,000 ga
Iraéutanũxũgü nixĩ ga yema
chixexũgagu namaxã yuexũ. ¹⁰Rü
yemawena ga Cori ya Tupana rü
Moichëmaxã nüxũ nixu rü nhanagürü:
¹¹—Yimã Finéyagagu nixĩ i
charüngüxmüxũ namaxã i ngëma
Iraéutanũxũgü erü nüma ga Finéya rü
chaurxũxũ poraãcü nayanuxũ i ngëma
Iraéutanũxũgü. Rü ngëmacax nixĩ i
yaxna ngëma duũxũgümaxã chaxĩnũ,
rü tama chanadaxichixũ. ¹²⁻¹³¡Rü
Finéyamaxã nüxũ ixu rü tá nüxũ
chaxuneta nax nüma rü nataagü nax
Iraéutanũxũgüarü chacherdótegü
yixĩgüxũçax i guxũgutáma! Erü nüma
rü çauxçax nayanuxũ rü yemagagu
nixĩ ga choxũ nangüxmüxëxũ namaxã
i ngëma Iraéutanũxũgü —nhanagürü.
.....

Miyiáüanecüâxgüxü nadai

31 ¹Rü nüma ga Cori ya Tupana rü nhanagürü nüxü: ²—¡Ëcü naxütanü i Iraéutanüxügü rü nadai i ngêma Miyiáüanecüâxgü erü chixexügu Iraéutanüxügüxü nayixê! Rü ngêmawena, Pa Moichéx, rü marü name nax cuyuxü —nhanagürü. ³Rü yexguma ga nüma ga Moiché rü duüxügüxü nhanagürü: —¡Nhuxre i pema rü penamexêxê i pexnegü nax Cori ya Tupanaégagu peyadaixüçax i Miyiáüanecüâxgü nax ngêmaâcü yixi ixütanüxüçax naxçax ga yema chixexü ga Tupanapexewa naxügüxü! ⁴Rü ngêmaçax rü wüxíticümüwachigü tá ngêma penamugü i 1000 chigü i churaragü i daiwa íxü. ⁵Rü ngêmaçax name nixi i wüxíticümüwachigü peyadexechixü i 1000 i churaragü nax ngêmaâcü guxüwama 12,000 wa nanguxüçax. Rü ngêmagü rü mea tá nixáxne nax daiwa naxixüçax —nhanagürü. ⁶Rü nüma ga Moiché rü inanamuâchitanü nax daiwa naxixüçax. Rü nüma ga chacherdóte ga Ereachá nane ga Finéya nixi ga íyaxümücüxü. Rü nüma nixi ga namaxá inacuáxü ga yema Tupanapataarü yemaxügü ga üünexü ga íyangegüxü rü cornétagü ga yacuegüne. ⁷Rü yexguma ga yema Iraéutanüxügü rü guxüma ga yema yatügü ga Miyiáüanecüâxgüxü nadai yema Cori ya Tupana Moichémaxá nüxü ixuxürüxü. ⁸Rü nanadai ga yema 5 ga Miyiáüanecüâxgüarü âëxgacügü ga Éwi, rü Requéü, rü Yur, rü Úru, rü Réba. Rü yexgumarüxü ta nayamaxgü ga Baraáü

ga Beú nane. ⁹Rü nüma ga Iraéutanüxügüarü churaragü rü ínanayauxü ga yema Miyiáüanecüâxgüarü ngexügü rü norü buxügü. Rü yexgumarüxü ta nayagagü ga norü wocagü rü togü ga naxünagü rü nayana ga norü yemaxügü. ¹⁰Rü nhüxüchi ínanagu ga norü íanegü ga taxüne rü norü íanexacügü. ¹¹⁻¹²Rü guxüma ga yema ngexügü rü buxügü ga ínayauxüxü rü wocagü rü togü ga naxünagü ga yagagüxü, rü Moichéxütawa rü chacherdóte ga Ereacháxütawa nanagagü ga ngextá yema togü ga Iraéutanüxügü íyexmagüxüwa ga Moábianearü metachinüxüwa ga natü ga Yurdáuarü léstewa ga íane ga Yericóarü toxmaxtawa. ¹³Rü nüma ga Moiché rü chacherdóte ga Ereachá rü guxüma ga togü ga âëxgacügü, rü yema churaragüçax nibuxmü nax yéma ínapegüxüpemagu nüxü yangaugüxüçax. ¹⁴⁻¹⁵Notürü nüma ga Moiché rü yema churaragüerugümaxá nanu rü nhanagürü nüxü: —¿Tüxcüü penamexêxêxê i ngêma ngexügü? ¹⁶Erü nümagü nixi i Baraáuarü ucuxê inaxínüexü rü yemamaxá nachixexêëgüaxü ga tatanüxü nax Baá-Peüxü yacuaxüügüxüçax. Rü yema chixexügüga nixi ga Tupana nadaixü ga tatanüxü. ¹⁷¡Rü nhüxmatama penadai i ngêma buxügü i yatüxü rü guxüma i ngêma ngexügü i marü yatümaxá maxêxü! ¹⁸Notürü ngêma paxügü i taguma yatümaxá maxêxü, rü ngexrüma nax penadaixü. Rü pexütaxüxü penayaxu ega penaxwaxegu —nhanagürü.

**Tupana nūxũ nixu nax nhuxãcü tá
nügü yanuãxũ i Canaáane**

33 ⁵⁰Rü nüma ga Cori ya Tupana
rü Moichémaxã nidexa ga
yexguma Moábianearü metachinūxũwa
nayexmagu ga natü ga Yurdáúcutüwa
ga Yericóarü toxmãxtawa. Rü
nhanagürü nüxũ: ⁵¹⁻⁵²—jĔcü ngẽma
Iraéutanūxũgūmaxã nüxũ ixu i nhaa
dexa!: “Ngẽxguma pema tá pichoũgu i
ngẽma natü i Yurdáú rü nawa
pichocuxgux i ngẽma Canaácüãxgüarü
naane, rü jĕcü ípenawoxũ i guxũma i
ngẽma duũxũgü nawa i ngẽma naane!
jRü nagu pepogüe i guxũma i norü
tupanachicünaxãgü i nutanaxcãx rü
úirunaxcãx rü diêrumünaxcãx! jRü
ngẽxgumarüxũ ta nagu pepogüe i
guxũma i norü âmaregüarü guchicaxũgü
i maxpúnetapegegüwa ngẽmagüxũ!
⁵³jRü pema namaxã ipecuá i ngẽma
nachixũane! jRü ngẽxma nagu
pexãchiũgü erü chatatama pexna
chanaxã nax pema nawa pemaxẽxũcãx!

⁵⁴Notürü ngẽxguma pegü peyanuxgu i
ngẽma naane rü wüxitücumüwachigü tá
nanayaxu i ngẽma nagu nanguxũ. Rü
ngẽma natücumü i rümumaexũ rü tá
nanayauxgü i rütamaexũ i naane. Rü
ngẽma natücumü i rünoxremaexũ rü tá
nanayauxgü i ngẽma rüxíramaexũ i
naane. Rü ngẽmaãcü
wüxitücumüwachigü tá nanayaxu i
ngẽma nagu nanguxũ. ⁵⁵Notürü i pema
rü ngẽxguma ngẽma naane peyaxgux
nax nagu pexãchiũgüxũcãx rü name nixĩ
i ípenawoxũ i guxũma i ngẽma duũxũgü
i ngẽxma ãchiũgüxũ. Erü ngẽxguma
taxütáma ípenawoxũgu i guxũma i
ngẽma duũxũgü, rü ngẽma ngẽma
yaxüxũ rü tá pexũ ngẽma nachixewe
nhama wüxi i naitüchi pexetügu
nguxgurüxũ, rü nhama wüxi ya tuxugu
penguxgurüxũ tá nixĩ. ⁵⁶Rü ngẽxguma i
chama rü tá pexũama chapoxcu namaxã
i ngẽma poxcu i ngẽma
duũxũgüxũchirex ixixũ”, nhanagürü ga
Cori ya Tupana.
.....